

# **Nopa Amatlajcuiloli tlen Pablo Quintlajcuilhui Tlaneltocani ipan Altepetyl Filipos**

Pablo quiijcuilo ni amatlajcuiloli para nopa achtohui tlasantilistli tlen tlaneltocani tlen yajaya quipehualti ipan Europa. Elqui nopa tiopamitl tlen altepetl Filipos ipan tlali Macedonia. Pablo quiijcuilo ni amatlapohuali quema itztoya ipan tlatzactli. Pero yajaya quinexti para tlahuel yolpaqui. Achtohui quintlascamatili nopa tlaneltocani tlen altepetl Filipos ipampa nopa tomi tlen quititlanilijque para quipiyas tlen ica panos. Pablo mocuesohuayaya quentzi pampa ipan nopa tiopamitl nojquiya calactoyaj tlacame tlen tlamachtiyaj tlamantli tlen ax monequi. Yeca quinyolchicajqui nopa tlaneltocani para ma mochihuaca temachme, ma motemacaca huan ma motemachica senquistoc ipan Toteco.

*Filipenses quipiya chicuase partes:*

*Filipenses 1:1-11* Pablo nimantzi quinextía para yolpaqui, quinicnelía huan motlascamatí ica nopa tlaneltocani tlen altepetl Filipos.

*Filipenses 1:12-26* Pablo ax quimati intla itztos o miquis.

*Filipenses 1:27 — 2:18* Quejatza monequi timonemiltise ipan Cristo.

*Filipenses 2:19-30* Tlen quichihuas Timoteo huan Epafroditō tlen eliyayaj itlapalehuijcahua.

*Filipenses 3:1 — 4:9* Pablo quinyolmelahua ma quipiyaca miyac cuidado ica sequin tlamantli huan ica tlacame tlen malhuilme.

*Filipenses 4:10-23* Pablo huan ihuampoyohua quintlajpalohua nopa tlaneltocani huan nelia yolpactoque ica nochī tlamantli.

### *Pablo ipan tlatzactli quintlajcuilhui tlaneltocani ipan Filipos*

<sup>1</sup> Na niPablo huan Timoteo tlen itztoc nohuaya, tojuanti tiitequipanojcahua Cristo Jesús tlen techcojtoc para ma tielica tiaxcahua. Timechtlajcuilhuijaj nochī imojuanti intlatzejzelotijca tlacajhua Toteco nepa ipan altepetl Filipos tlen yajaya inmechtlatzquiltijtoc ipan Jesucristo. Nimechtlajcuilhuía nochī imojuanti inihuaya imotlayacancahua huan imotlapalehuijcahua ipan tlasenlistli.

<sup>2</sup> Toteco Totata huan Toteco Jesucristo ma quipiyaca hueyi ininyolo ica imojuanti, huan ma inmechmacaca tlasehuilistli ipan imoyolo.

### *Pablo momaijto ipampa nopa tlaneltocani*

<sup>3</sup> Nochipa quema nimechilnamiqui, nijtlasca-mati Toteco imopampa.

<sup>4</sup> Huan nochipa ninelpaqui quema nimomaijtohua ica Toteco imopampa,

<sup>5</sup> pampa hasta quema achtohui inquinelto-caque Toteco huan hasta ama intepohuilijtoque tlen Cristo huan innechpalehuijtoque para ma momoyahua itlajtol.

**6** Huan temachtli nijmati ya ni. Nopa cuali tequitl tlen Toteco quipehualtijtoc ipan imoyolo quema inquineltocaque, quisenhuiquilis quicualtlalijtiyas mojmostla hasta quitlamiltis ipan nopa tonal quema Jesucristo hualas.

**7** Cuali para nimoilhuía quej ni tlen imojuanti pampa nelía nimechhuica ipan noyolo. Hueyi iyolo Toteco ica nochí tojuanti huan san sejco techtiochijtoc miyac. Huan yonque niitztoc ipan tlatzactli, o nimonextía iniiexpa tequihuejme para nijmanahuis itlajtol Toteco, o san niteilhuía itlajtol, innechpalehuijtihualahuíj ipan nochí tlamantli.

**8** Toteco quimati nelía miyac nimechicnelía ica nochí nopa teicnelijcayotl tlen Jesucristo nechmacatoc.

**9** Quema nimomaijtohua, nijtlajtlanía Toteco para noja más xiquinicnelica sequinoc, huan para noja más xijmatica tlen ya, huan xijpiyaca nelía cuali imotlalnamiquilis.

**10** Nijnequi xijmatica quejatza inquitlapenise tlen nelía cuali para initztose senquistoc intlapajpactique. Huan queja nopa axaca huelis inmechteihuis ama, niyon quema Cristo sampa mocuepas.

**11** Nochipa xijchihuaca tlen cuali huan tlen xitlahuac iixpa Toteco. Huan quema tlacame quiitase nochí nopa cuali tlamantli tlen Jesucristo inmechpalehuía xijchihuaca, quihueyimatise huan quipaquilismacase Toteco.

*Pablo noja quinejqui quitequipanos Cristo*

**12** Noicnihua, nijnequi xijmatica para nochí ni tlaijiyohuilistli tlen nechpanotihuajtoci quipale-huijtoc para más ma momoyahua itlajtol Toteco.

**13** Ama nochí tlen itztoque nican quimati jnitzactoc san pampa nijneltoca Cristo. Huan hasta nojquia quimati jnochí nopa soldados tlen quimocuitlahuiáj nopa hueyi cali campa itztoc nopa hueyi tlanahuatijquetl.

**14** Huan pampa nitzactoc, miyac tlaneltocani ayoc majmahuij huan achi más mosemacatoque ipan Toteco, huan yeca ama más moneltlalíaj para quinilhuise sequinoc itlajtol.

**15** Sequin nelía quincamahuíaj tlacame itlajtol Toteco pampa nechcocolíaj huan quinequij mo-hueyimatise ica tlen quichihuaj, pero sequinoc quincamahuíaj tlacame tlen Cristo ica ininyolo cuali iixpa Toteco.

**16** Inijuanti tlen nechcocolíaj tecamahuíaj itlajtol Toteco para tlacame ma quintlepanitaca. Ax quichihuaj nelía para Toteco. Huan moilhuíaj más nechyolcocose pampa nitzactoc quema nijmatis tlen quichihuaj.

**17** Pero nopa sequinoc tlacame, quena, tecamahuíaj itlajtol Toteco pampa nechicnelíaj. Huan inijuanti quimati jToteco nechtequitlalijtoc nican para nijmanahuis itlajtol iniixpa tequihuejme.

**18** Pero ax quenijqui. Yonque sequin teilhuíaj itlajtol ica nochí ininyolo huan sequinoc ax cuali ininyolo, noja nipaqui pampa miyac tlacame quinilhuíaj sequinoc tlen Cristo. Huan noja más nipaquis,

**19** pampa nijmati nochí quisas cuali para na huan se tonal nechmanahuise pampa inquitlajtlaníaj Toteco nopampa na huan Itonal Jesucristo nechpalehuía mojmostla.

**20** Ax quema nijnequi nijchihuas se tlamatli tlen ica nimopinahuas iixpa. Ya nopa tlen nijchiya. San nijnequi nimoneltlalis para Cristo para tlacame ma quiitaca ihueyitilis ipan nonemilis yonque niitztos para más tonali o yonque nechmictise.

**21** Pampa intla niitztos, niitztos para nijtequipanos Cristo. Huan intla nimquis, nijtlanis nelía miyac, pampa niitztoti ihuaya Cristo para nochipa.

**22** Pero intla noja niitztos, huajca noja más nitequitis para Toteco huan más tlacame quinelto case Cristo. Yeca nelía ax nijmati tlaque nijtlapejpenis. Ax nijmati intla nijnequi niitztos o nijnequi nimquis.

**23** Ohui para nijmatis tlen más cuali. Quemantzi nimoilhuía huelis achi más cuali para niitztos. Huan quemantzi nimoilhuía achi cuali para nimquis huan niyas niitztoti ihuaya Cristo pampa ya nopa tlen más cuali para na.

**24** Pero para imojuanti quisas más cuali intla noja niitztos.

**25** Huajca nimoilhuía para noja niitztos para nimechpalehuis inmoscaltise ipan Toteco huan más impactose pampa cuali inquineltocaj.

**26** Intla niitztos, huajca quema nimechpaxaloti, sampa inquitlascamatise Cristo Jesús pampa quichijtoc para ma nechchololtica tlen ni tlatzactli huan sampa niitztos imohuaya.

<sup>27</sup> Pero yonque tlen hueli tlen ni ome tlamantli nopantis, tlen más ipati elis para ximonejne-miltica nelía cuali queja tlen quijjtohua itlajtol Toteco. Quej nopa yonque noja niyas nepa campa imojuanti o axtle, nijcaquis quejatza initztoque intemachme ipan Toteco, huan inquipiyaj san se imoyolo, huan chicahuac intequitij para tlacame ma quineltocaca itlajtol Toteco.

<sup>28</sup> Nyon quentzi amo xiquinimacasica tlen inmechcocolíaj. Huan quema noja más inmonelt-lalise para Toteco, ya nopa elis se tlanescayotl tlen quinnextilis para Toteco inmechmaquixtijtoc imojuanti huan para inijuanti nelía polihuise.

<sup>29</sup> Pampa Toteco ax san inmechmacatoc nopa paquilibrium para xijneltocaca Cristo, nojquiya inmechmacatoc nopa paquilibrium xitlaijiyohuica pampa iniaxcahua.

<sup>30</sup> Tojuanti tiitztoque san sejco ipan ni hueyi tlatehuijcyayotl ica tlen ax cuali. Innechitztoque quema nitlaijiyohuiyaya achtohuiya huan inquimatij hasta ama noja nitlaijiyohuía.

## 2

### *Jesús tlen hueyi, moicnonejqui*

<sup>1</sup> Ya inquimatij para Toteco inmechicnelía huan inmechtlatzquiltijtoc ipan Cristo, huan inquimatij quejatza ya nopa inmechyolchicahua huan inmechyoltlalía. Inquimatij Itonal Toteco itztoc imohuaya huan inmechchihuilá ximoicnelica huan ximotlasojoatlaca.

<sup>2</sup> Huajca xijchihuaca tlen nechmacas hueyi paquilibrium huan xijpiyaca san se

imotlalnamiquilis. Nochi imojuanti ximoicnelica miyac huan xitequitica san sejco queja inelisquíaj san se tlacatl ica san se imoyolo.

<sup>3</sup> Axaca ma quichihua se tlamatli pampa quinequi mohueyimatis iniixpa sequinoc. Ma axaca mohueyimati, pero ximoicnonequica. Sesen imojuanti xiquinitaca nochi sequinoc queja más huejhueyi que ta.

<sup>4</sup> Amo san ximoilhuica tlen tlamatli tlen inmechpalehuis. Nojquiya ximoilhuica tlen quinpalehuis sequinoc.

<sup>5</sup> Ximoyolilhuica queja Cristo Jesús moilhuía:

<sup>6</sup> Yonque yajaya Dios huan hueltosquía mocajtosquía campa ipa itztoya ihuaya Toteco Dios,

ax moilhui para monequi mocahuas nopona ica nopa hueyi tlanahuatili tlen quipixtoya.

<sup>7</sup> Moilhui achi cuali quicahuas nochi tlen eliyaya iaxca,

huan huajca mochijqui queja se tlen ax quipixqui niyon quentzi tlanahuatili.

Moicnoneyqui huan mochijqui se tlacatl,  
quena, mochijqui queja se tlatequipanojquetl.

<sup>8</sup> Huan quema ya itztoya se tlacatl,  
más moicnoneyqui para senquistoc quichihuas tlen iTata quinequiyaya.

Quena, motemamac para miquis ipan se cuamapeli,

nopa miquistli tlen más quipiya pinahualistli.

<sup>9</sup> Huan pampa moicnoneyqui teipa Toteco quihueytlali nepa elhuicac,

huan quichijqui más hueyi que nochí sequinoc  
pampa quimacatoc nopa tlanahuatili tlen  
más hueyi.

**10** Huan Toteco quichijqui ni para ma motlancua-  
quetzaca iixpa Jesús nochí tlen itztoque  
ipan elhuicac, nochí ipan tlaltepactli huan  
nochí tlen itztoque ipan mictla pampa mo-  
macase cuenta para yaja tlen más hueyi.

**11** Huan nochí tlacame tlen camatij nochí tla-  
mantli tlajtoli quijtose tlamiyacapa para  
Jesucristo, yajaya Dios Tohueyiteco, huan  
ica ya ni quinextise ihueyitilis Toteco To-  
tata.

### *Tlaneltocani itztoque queja se tlahuili*

**12** Noicnihua tlen nimechicnelía, nochipa in-  
quichijtihualajtoque tlen nimechilhuijtoc quema  
niitztoya imohuaya. Huajca ama, quema ax  
niaqui, achi más xinechcaquica. Xijchijtinem-  
ica tlen xitlahuac queja quinamiqui para ma  
mopannextis ipan imojuanti para Toteco nelía  
inmechmaquixtijtoc tlen imotlajtlacolhua. Xiitz-  
toca queja tlacame tlen huihuipicaj pampa tlahuel  
quiimacasij quiixpanose Toteco Dios.

**13** Pampa yajaya Toteco tlen tequiti ipan imoy-  
olo huan inmechchihua xijnequica xijchihuaca  
ipaquilis, huan yajaya inmechmacas chicahual-  
istli para inquichihuase.

**14** Ica nochí tlen inquichihuaj ximomocuit-  
lahuica para amo ximotlajilhuica, niyon amo xi-  
monajnanquilica.

**15** Huan quej nopa axaca huelis inmechteilhuis  
ica niyon se imotlajtlacol. Xijpiyaca se yolistli

tlen tlapajpactic queja quinamiqui pampa imojuanti iniconehua Toteco. Xiitztoca queja tlahuili ipan ni tlaltepactli campa senquistoc onca tzintlayohuilotl. Quena, yonque initztoque inihuaya miyac tlacame tlen tlahuel fiero inintlanamiquilis huan tlen onpano quinpactia tlajtla-colchihuase ma cahuani imotlahuil.

<sup>16</sup> Huan mojmostla ximotlatzquilijtoca cuali ipan itlajtol Toteco tlen temaca yolistli yancuic, huan queja nopa ipan nopa tonal quema Cristo mocuepas, tlahuel miyac nipaquis ica nochil tlen inquichijtoque, huan nijmatis para ax san tlaptic elqui notequi quema niyajqui nimechilhuito itlajtol Toteco.

<sup>17</sup> Imotlaneltoquilis eltoc queja se tlacajcahualistli tlen inquimacaj Toteco huan intla nim quis, nonemilis elis queja se tlacajcahualistli para Toteco. Huajca yonque tlen hueli nopantis, nipaquis huan nijnequi xipaqui ca nohuaya.

<sup>18</sup> Xipaqui ca nohuaya intla monequi nim quis pampa nijtoquilia Cristo.

*Epafrodito huan teipa Timoteo yase altepetl Fil-  
ipos*

<sup>19</sup> Intla ipaquilis Tohueyiteco Jesús, nijnequi para ax huejcahuas nijtitlanis Timoteo ma inmechitati. Huan quema mocuepas nicani, nijpiyas paquillistli pampa nechpohuilis quejatza initztoque.

<sup>20</sup> Pampa axaca seyoc quipiya se iyolo queja Timoteo. Yajaya, queja na, motequipachohua imopampa para xinejnemica cuali.

**21** Nochi sequinoc tlen itztoque nicaní san moilhuíaj tlen cuali para injuanti. Ax moilhuíaj quejatza huelis quipalehuise itequi Cristo Jesús.

**22** Imojuanti ya inquiixmatij inemilis Timoteo pampa queja se oquichpil tlen ica paquillistli quipalehuía itata, yajaya nechpalehuijtoc para niquinilhuía tlacame itlajtol Toteco.

**23** Huajca nijnequi nijtitlanis para ma inmechitati. San achtohui monequi nijmatis tlaque nopantis nicaní.

**24** Huan nimotemachía ipan Toteco para ax huejahuas na nojquiya niyas nimechitati.

**25** Pero para amantzi, nimoilhuía más cuali sampa nimechtitlanilis toicni Epafrodito tlen innechtitlanilijque para ma nechhualiquili tlen inquisentilijque para ica nimopanoltis ipan itequi Toteco. Huan nojquiya tequitico nohuaya ipan itequi Toteco, pampa nechpalehuía. Pampa nechpalehuía ipan nopa tlatehuijcayotl tlen tijpiyaj ica tlen ax cuali.

**26** Pero ama yajaya tlahuel quinequi mocuepas campa imojuanti pampa tlahuel mocuesohua pampa inquicajque para mococohuayaya.

**27** Huan nelía mococohuayaya hasta mictinemiyaya. Pero Toteco quitlasoxtlac huan nojquiya nechtlaosojtlac na huan yajaya mochicajqui. Pampa intla mictosquía, nijpiyasquía noja más cuesoli tlen nijpiya amantzi.

**28** Yeca achi más nimoisihuáltia nimechtitlanilis para inpaquise quema sampa inquiitase, huan ica ya nopa na nojquiya nipaquis.

**29** Huajca xijselica Epafrodito ica cuali ipan Toteco huan ica miyac paquillistli. Nochipa

xiquintlepanitaca nochí tlaneltocani tlen mone-jnemiltíaj xitlahuac queja ya.

<sup>30</sup> Quena, mictoyaya pampa quichihuayaya ite-qui Cristo huan ica quentzi mictoyaya pampa nechchihuiliyaya nopa tequitl tlen ax inhuelque innechchihuiliyque pampa initztoyaj huejca.

### 3

#### *Se toyolo tlen xitlahuac iixpa Toteco*

<sup>1</sup> Huan ama, noicnihua, xijpiyaca paquilibrium ipan Tohueyiteco. Para na ax ya se tequitl para sampa nimechilhuis tlen ya nimechilhuijtoc, huan cuali para imojuanti intla sampa nimechilhuis.

<sup>2</sup> Xitlachixtoca ica nopa ax cuajcualme tlen mosisiníaj queja chichime huan quinپactía motequiliise inintlacayo. Ax melahuac inintlajtol. Tlamachtíaj para nochí tlacame monequi ma motequilica nopa tlanescayotl tlen itoca circuncisión para huelis momaquixtise tlen inintlajtlacolhua.

<sup>3</sup> Pero nelía eltoc tojuanti tlen tijpiyaj nopa tlanescayotl tlen itoca circuncisión tlen nelía ipati, pampa tojuanti tijhueyichihuaj Toteco Dios ica itlapalehuil Itonal Toteco. Tojuanti ax timotemachíaj ipan tlen se tlacatl quichihuiliytoc totlacyo. Timotemachíaj ipan Cristo Jesús huan tlen yajaya techchihuiliytoc.

<sup>4</sup> Na achi más que sequinoc nihueltosquía nimotemachijtosquía ipan nopa tlen na niitztoya para nimotlajtlacolquixtilijtosquía pampa na achi más njchijtinemiyaya nopa tlamantli tlen israelitame moilhuíaj temaquixtisquía.

<sup>5</sup> Nechtequilijque nopa tlanescayotl tlen itoca circuncisión ipan notlacayo quema njpiyayaya chicueyi tonali. Nitlacatqui niisraelita pampa niiteipa ixhui Benjamín, icono Israel tlen huejcajquiya. Nicamati hebreo pampa nitlacatqui ipan se familia tlen hebreo tlacame. Huan teipa quema nimotlacachijqui, nimochijqui se nifariseo, injuanti tlen achi más chicahuac quitoquilíaj itlanahuatil Moisés.

<sup>6</sup> Huan pampa tlahuel niquintoquili inintlanahuatilhua nopa fariseos, njtlatzacuiltiyaya itiopa Toteco, tlen quiijtosnequi nochí tlacame tlen quineltocaj Cristo. Huan axaca huelqui nechteilhuía ica itlanahuatilhua Moisés, pampa njchijqui nochí tlen quiijto.

<sup>7</sup> Pero nochí nopa tlamanatlí tlen achtohuiya nimoilhuiyaya para tlahuel ipati, teipa niquitac para ax tleno ipati quema njmachili tlen Cristo nechchihuili.

<sup>8</sup> Quena, niquita nochí tlamanatlí queja ax tleno ipati. Ama san njnequi niquixmatis Jesucristo, nohueyiTeco, huan san ya nopa niquita para hueyi ipati. Huajca ama njtlahuelcajtoc nochí tlen njchihuayaya huan tlen achtohui nieliyaya, huan niquita nochí nopa tlamanatlí san queja tla-soli para huelis njtoquilis Jesucristo,

<sup>9</sup> huan njtlatzquitos ipan ya. Ama njmati para ax niitztoc xitlahuac iixpa Toteco ipampa tlen njchihuayaya quema njtoquiliyaya nopa tlanahuatili. Pero Toteco nechchijqui nixitlahuac quema njneltocac Cristo, pampa Toteco quinchihua tlacame xitlahuaque iixpa ipampa inintlaneltoquilis ipan Jesucristo.

**10** Huajca ama san ya ni nijnequi. Nijnequi niquixmatis Cristo huan nijmachilis ipan na nopa hueyi chicahualistli ica tlen moyolcuic. Nijnequi nitlaijiyohuis se quentzi queja yajaya tlaijiyohui. Nijnequi mojmostla nimotemactilis ica ya yonque monequi nimiquis ipampa.

**11** Quena, huan nochí nijchihua pampa quema nimiquis, nijnequi nimoyolcuis huan niquisas campa mijcatzitzti.

*Pablo quinejqui monejnemiltis noja más cuali*

**12** Ax niquijtohua para nijpiya nonemilis tlen senquistoc cuali, niyon ax hueli niquijtos para ax onca niyon se notlajtlacol. Pero mojmostla nijchihua campeca para nijchihuas más tlen cuali para se tonal nicaxilis nopa tlen Jesús quinequiyaya ma nieli quema ya nechmaquixti huan nechnotzqui para ma nieli niiaxca.

**13** Noicnihua, ax ninemi nelía cuali queja nijnequi ninemis. Pero ya ni nijchihua: Mojmostla niquilcahua tlen nijchijqui yalhuaya huan san nimoyolihuía tlen cuali huelis nijchihuas ama.

**14** Mojmostla ica nochí noyolo nijchihua campeca para ninejnemis nelía cuali. Nijnequi nielis queja se tlatlanquetl tlen motlalohua hasta itlamiya. Huan yeca quinotzas para yas huejcapa iniiexpa nochí para quiselis tlen quitlantoc. Nijnequi nijselis nopa tlatlancayotl tlen nechmacas Toteco Dios. Yajaya tlen technotzqui ipan Jesucristo para ma tiyaca huejcapa hasta elhuicac para tijselise tlen onca para tojuanti.

**15** Nochi intlaneltocani tlen ya intetixtoque ipan Cristo monequi ximoilhuica queja na huan xijtemoca mojmostla quejatza inhuelise inmonejnemiltise noja más cuali. Huan intla sequin imojuanti inmoilhuíaj para ayoc tleno más inmechpolohua para inmonejnemiltise nelía cuali, huajca Toteco inmechnextilis para aya inquiaxilíaj pampa aya inquichihuaj nochi tlen senquistoc xitlahuac.

**16** Pero para ama monequi mojmostla ma tinejnemica queja quijjtohua nochi itlajtol tlen ya tijmajto queja.

**17** Noicnihua, nochi imojuanti ximonejnemiltica queja na nimonejnemiltía. Nojquiya ximomacaca cuenta ajqueya más monemiltíaj cuali queja tojuanti.

**18** Nimechilhuijtoc ya ni miyac huelta huan ama nichoca para sampa nimechilhuis. Itztoque miyac tlacame tlen quijjtohuaj quitoquilíaj Cristo, pero ica inninemilis quinextíaj para quicocolíaj tlen yajaya quinchihuili quema mijqui ipan cuamapeli.

**19** Nopa tlacame polihuise para nochipa. Ax quema moilhuíaj tlen Toteco. San moilhuíaj tlen quinequij inintlacayo huan sentlacuaj se tonal. Monequi mopinahuasquíaj ica nochi tlen fiero quichijtoque, pero inijuanti mohueyimatij. Nopa tlacame san moilhuíaj tlen eltoc ipan ni tlaltepactli.

**20** Pero tojuanti ax tiitztoque queja inijuanti. Tojuanti ayoc tiehuaj nicaní, tojuanti ticomun tlacame nepa elhuicac campa itztoc Tohueyiteco. Huan ama titlachixtoque para sampa hualas Tohueyiteco Jesucristo.

**21** Huan quema hualas, yajaya techpatilis ni totlacayo tlen teicneltzi tlen ama titlacame tijpiyaj para elis queja ya itlacayo tlen yancuic huan tlen eltoc nelía cuali. Huan Jesucristo huelis techpatilis totlacayo pampa quipiya nopa chicahualistli tlen más hueyi tlen quimaca tlanahuatili ica nochí tlacame huan nochí tlen onca.

## 4

### *Xipactoca nochipa ipan Tohueyiteco*

**1** Huajca, noicnihua, na nelía nimechicnelía miyac huan ica nochí noyolo nijnequi nimechitati pampa tlahuel innechmacaj paquelistli. Para na, imojuanti initztoque queja se corona o se tlatlancayotl tlen nijtlantoc nepa elhuicac pampa nimechilhui itlajtol Toteco. Xijsenhuiquilica xiitztoca intemachme ipan Toteco. Nimechicnelía miyac.

**2** Nijnequi niquintlajtlanis nopa sihuame Evodia huan Síntique ma motlapojpolhuica se ica seyoc huan ma quipiyaca san se inintlalnamiquilis ipan Jesucristo.

**3** Quena, huan nojquiya nimitztlajtlanía ta tlen nelía titequiti nohuaya para xiquinpalehui nopa sihuame ma moyoltlalica. Inijuanti tequititoque chicahuac para nechpalehuijque tiquinilhuijque tlacame itlajtol Toteco. Nojquiya Clemente huan sequinoc toicnihua quinpalehuijque para teilhuise itlajtol. Nochi inijuanti quipiyaj inintoca ijcuilijtoc ipan nopa amatl nepa elhuicac campa ijcuilijtoc nochí tlen quipiyaj yolistli yancuic para nochipa.

<sup>4</sup> Nochipa xipactoca ipan Tohueyiteco. Sampa nimechilhuía, xipactoca.

<sup>5</sup> Ma nochí tlacame quiitaca quejatza inquichihuíaj tlen cuali aqui hueli tlacatl. Xiquilnamicotoca nechcatitoc para sampa hualas Tohueyiteco.

<sup>6</sup> Ayoc ximotequipachoca ica niyon se tlamantli. Más cuali ximomaijtoca ica Toteco ica nochí tlen inmechpanotihuala. Xijtlajtlanica ma inmechmaca nochí tlen monequi huan xijtlascamatica para nochí tlen inmechchihuilitjoc.

<sup>7</sup> Intla queja nopa inquichihuaj, Toteco inmechmacas tlasehuilistli ipan imoyolo tlen tlacame ax huelis quimachilise. Huan nopa tlasehuilistli quiyahualtzacuas imoyolo huan imotlalnamiquilis Toteco pampa inmechtlatzquiltijtoc ipan Cristo.

### *Ximoyolilhuica tlen cuali*

<sup>8</sup> Huan ama noicnihua, xinechtlacaquilica. San ya ni para nijtlamiltis ni tlajcuiloli. Ipan imotlalnamiquilis, san ximoyolilhuijtinemica tlen tlamantli tlen melahuac huan tlamantli tlen nochí quittlepanitaj. Ximoyolilhuica tlen tlamantli tlen xitlahuac huan tlen tlapajpactic. Ximoyolilhuica nopa tlamantli tlen yejyectzi huan tlen nochí tlacame quicualitaj. Quena, ximoyolilhuijtinemica tlen tlamantli tlen tlapalehuía huan tlen nochí tlacame quicualitaj. Quena, intla inquicaquij tlen hueli tlamantli tlen nelía cuali huan tlen nochí tlacame quihueyitlalíaj, san ya ni ximoyolilhuica.

<sup>9</sup> Xijsenhuiquilica xijchihuaca nochí nopa tlamantli tlen nimechmachtijtoc o nimechijcuilhuilitjoc. Quena, nochí tlen inquicactoque huan in-

quiitztoque para nijchihua, ya nopa xijchihuaca huan itztos imohuaya Itonal Toteco Dios tlen temaca paquelistli.

*Altepetyl Filipos ehuani quimacatoyaj tomi Pablo*

**10** Na nipaqui miyac huan nijtlascamati Toteco pampa sampa intechilnamijque huan innechtitlanilijque se quentzi tlen ica nimopanoltis. Nijmati para nochipa inquinectoche innechpalehuise, pero panoc tonali quema ax inquipixque quejatza innechpalehuíaj.

**11** Ax nimechilhuía nimocuesohuayaya pampa nechpolohuayaya tlen ica nipanos. Pampa nimo-matquiya huan nijpiyas paquelistli ica tlen nipan-otihuala.

**12** Nipaqui quema nijpiya pilquentzi tlen ica nipanos huan nojquiya nipaqui quema nijpiya hasta mocahua. Nipaqui quema nimayana huan quema niixhuitoc. Nipactoc ica miyac o ica quentzi.

**13** Nochi nihueli nijchihua ica nopa chicahualistli tlen Cristo nechmaca.

**14** Pero yonque nipaqui ica tlen onca, cuali para innechpalehuijque ica tlen monequi para nipanos.

**15** Imojuanti inquiilnamiquij quema achtohuiya nimechilhui itlajtol Toteco huan teipa quema niquisqui imotlal para niyajqui tlali Macedonia huan ipan sequinoc tlaltini, san imojuanti tlen inehuaj altepetl Filipos, innechpalehuijque, huan yeca inquiselijque itlatiochihualis Toteco.

**16** Hasta quema nimocahuayaya ipan altepetl Tesalónica, ompa o expa innechtitlanilijque tomi para ica nipanos.

**17** Ax nipaqui san pampa innechmacaque tlen ica nipanos, más nipaqui pampa nijmati Toteco paqui ica nopa cuali tequitl tlen inquichijtoque. Huan yeca yajaya quitlalis ipan imocuenta huan inmechtlahtahuis huan inmechtiochihuas.

**18** Ama ica ni tomi tlen innechtitlanilijque ica Epafrodito, nijpiya nochi tlen monequi. Nelía nijpiya hasta mocahua. Tlen innechmacatoque quipactía Toteco queja inquimacatosquíaj se tlacajcahualistli tlen ajhuiyac mijyotía huan tlejco hasta elhuicac.

**19** Huan ni Toteco tlen nechmocuitlahuía na, inmechmacas imojuanti nochi tlen inmechpolohua pampa tlahuel miyac iricojyo nepa ipan elhuicac huan techmacas ipampa tlen Cristo Jesús techchihuilijtoc.

**20** Ma tijhueyichihuaca Toteco Dios yajaya tlen Totata para nochipa. Quena, ma ax quema tijtlamiltica tijhueyichihuaj. Quej nopa ma eli.

### *Pablo quinhualtlajpalo*

**21** Xiquintlajpaloca nochi toicnihua ipan Cristo Jesús, quena, xiquintlajpaloca nochi iconehua Toteco tlen quiniyocacajtoc para iaxcahua. Toicnihua tlen itztoque nicani nohuaya inmechontlajpalohuaj.

**22** Huan nochi sequinoc tlen Toteco quiyyocacajtoc ipan ni altepetl inmechontlajpalohuaj. Huan achi más inmechontlajpalohuaj tlen iaxcahua Toteco tlen tequitij ipan nopa hueyi cali para nopa hueyi tlahuatijquetl, César.

**23** Tohueyiteco Jesucristo ma quipiya hueyi iy-  
olo ica imojuanti. Quej nopa ma eli.

**Ya ni nopa yancuic tlajtoli tlen toteco toca  
mocajtoc; El Nuevo Testamento de nuestro  
Señor Jesucristo en el náhuatl de la Huasteca  
Oriental**

**New Testament in Nahuatl, Huasteca Oriental  
(MX:nhe:Nahuatl, Huasteca Oriental)**

copyright © 2009 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Nahuatl, Huasteca Oriental

nhe

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Eastern Huasteca

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

dcocab8b4-054c-57af-b01b-e6eb93844d64